

山陰陳士鐸遠公著

辨證冰鑑

白下李遜齋

宣統元年北京

龍文閣西法印

辨證冰鑑序

古今人有活人之術者必濟之以活人之心然後可以救世而垂永久山陽程葭應先生抱道耽幽樂善不倦創設普濟堂規模宏遠綜理周密四方之病而無所歸者歲全活逾數千人嘗以良醫不可多得四民疾苦往往誤於庸劣之手思所以補救爰舉陳遠公先生辨證冰鑑刊以行世遠公山陰高士嘗于長安邂逅異人得授石室秘錄一書朝夕研究學益精理益邃因註素問繼又著為是書其自序云不知症不可以用藥不辨症不可以治人又云人病最多辨症宜悉談哉是言也但惜向少刊本世鮮流傳則雖有其書而遠公之志實未能酬也今先生以此書付剞劂流布海寓俾世之讀是書者如軒鑑當前聽人自照病者可不為似是而非之醫所誤醫者亦不致以似是而非之說誤人嘻先生之志可謂勤且遠矣余嘗閱歷代經籍藝文方技諸志有其書者而不傳與雖傳而不久非但作者之恨亦千萬世不及見者之恨故述者之功與作者並遠公書垂後世而先生為之嚆矢先生活人之心甯不與遠公活人之術並傳不朽歟余早耳先生名庚子春偶來淮上登普濟堂覽溫太史如玉所為志又得見是書為之擊噓太息而不能已何先生好善一至於此也用為之序題其簡端以志余欣慕之意云歸安沈樹德畏堂甫譔

辨證冰鑑鈔本司李張君鴻樵得之故書攤者曩鴻樵客京邸與余結文字交悉其兼通醫學嗣選官來直隸復官同省一日出此書見示余公冗未遑卒讀適惡手麻證新瘳乃摘書中論手麻一條觀其審證議方有實獲我心之妙洎檢閱各條皆稱是知作者於此道三折肱矣嘗怪世之業醫者讀書未畢一經輒取坊刻之湯頭歌藥性賦稍事呶唔遽私為枕中鴻寶證且不之辨何有於脈又何有於方嗟乎庸醫殺人古今所深痛也夫醫之為道有三要曰診脈曰辨證曰定方而辨證尤三要中之最要診脈如叩寂不辨證則叩寂未能求音定方如行軍不辨證則行軍未能量敵昔長沙太守張仲景機者傷寒一百一十三方先範之以三百九十七法又慮治傷寒者不可以治雜病別著金匱二十五篇類列二百六十二方仲景為曠代聖醫舍證且不能定方況其下焉者乎惟是二書之作其旨遠其辭文亟索解人不得末俗爭趨便捷以先正典型為高遠妄肆古方不可治令病之謬說我朝葉天士出撰臨證指南一書分明別類繁而有要博而能精其議藥也洞達癥瘕無補瀉寒溫之偏勝其議病也別出手眼有表裏虛實之分途寬乎醫書中金科玉律也惜讀者多病其駁雜又有宜南不宜北之論坐令青囊秘笈雖傳而不甚傳吁可慨已余於醫未嘗習以善病時涉獵及之今得此書愛不忍釋念當世必有同好如余者亟亟付手民行世俾海內業醫之士知方之視乎證猶射之視乎的舍的不可以射故舍證不可以方由是而博觀傷寒金匱之全進求脈訣難經之深窮究素問靈樞之奧出佔危而躋仁壽詎非先生此書所津逮者哉先生姓陳名士鐸字遠公浙之山陰人大概具舊序中茲不贅時在

光緒二十年歲次甲子秋九月涇川梅園潘駿德序於清河道署

辨證冰鑑總目

子部卷之一

傷寒門 四十三則

中寒門 七則

丑部卷之二

中風門 二十五則

痺症門 十一則

心痛門 六則

脇痛門 五則

頭痛門 六則

腹痛門 六則

腰痛門 六則

寅部卷之三

大便閉結門 九則

小便不通門 六則

內傷門 二十三則

疝氣門 附奔豚八則

陰痿門 五則

痰症門 二十則

卯部卷之四

五鬱門 六則

欬嗽門 八則

喘門 四則

怔忡門 三則

驚悸門 二則

虛煩門 三則

不寐門 五則

健忘門 四則

癲癩門 六則

狂病門 六則

呆病門 三則

呃逆門 五則

辰部卷之五

關格門 五則

中滿門 四則

翻胃門 五則

臌脹門 七則

厥症門 七則

春溫門 三十三則

巳部卷之六

火熱正門 十五則

傷暑門 十一則

燥症門 十五則

痿症門 八則

消渴門 五則

午部卷之七

癰疽門 十一則

汗症門 五則

五癰門 十則

大瀉門 九則

痢疾門 十二則

癰疽門 八則

未部卷之八

瘡症門 十則

虛損門 十三則

癰瘡門 十七則

夢遺門 七則

陰陽脫門 五則

淋症門 七則

申部卷之九

咽喉門 七則

牙齒門 六則

鼻淵門 三則

目痛門 十四則

耳病門 七則

口舌門 二則

血症門 二十一則

偏身骨痛門 四則

酉部卷之十

鶴膝門 二則

癰風門 二則

遺尿門 三則

脫肛門 二則

陽強不倒門 二則

發斑門 二則

火丹門 三則

離魂門 三則

疰夏門 二則

腳氣門 一則

中邪門 六則

中妖門 六則

中毒門 十二則

腸鳴門 三則

自笑門 附自哭三則

惱怒門 二則

暗啞門 三則

瘟疫門 一則

種嗣門 九則

戌部卷之十一 女科

帶門 五則

血枯門 二則

血崩門 七則

調經門 十四則

受妊門 十則

妊娠惡阻門 二則

安胎門 十則

小產門 五則

鬼胎門 一則

難產門 六則

血暈門 三則

胞衣不下門 二則

產後諸症門 十一則

下乳門 二則

亥部卷之十二 外科小兒科

背癰門 七則

肺癰門 四則

肝癰門 三則

大腸癰門 三則

小腸癰門 三則

無名腫毒門 二則

對口癰門 一則

腦疽門 一則

囊癰門 二則

臂癰門 一則

乳癰門 四則

肚癰門 一則

多骨疽門 一則

惡疽門 一則

疔瘡門 一則

楊梅瘡門 五則

腰疽門 一則

擎疽門 一則

腳疽門 二則

鬢疽門 一則

唇疽門 一則

瘰癧門 二則

痔漏門 四則

頑瘡門 二則

接骨門 二則

金瘡門 一則

物傷門 三則

癰門 一則

刑杖門 一則

驚疳吐瀉門 七則

便蟲門 二則

痘瘡門 十五則

疹瘡門 三則

吃泥門 一則

胎毒門 一則

以上共計一百二十六門

七百六十九則

山陰陳士鐸遠公著

陳遠公曰。醫道之難也。不知症。不可以用藥。不辨症。不可以活人。此症之必宜辨也。余初得太倉公辨症奇函。以為辨症盡於此矣。後逢岐伯仲景張公兩夫子。朝夕辨難。始知人病最多。辨症宜悉。太倉公尚未十分之四也。日記師言。書之成帙。共若干篇。統各證而論之。存於笥中。以為時醫之冰鑑云。

傷寒門 共四十三則

一冬月傷寒。發熱頭疼。汗出口渴。人以為太陽症也。誰知太陽已趨于陽明乎。若徒用乾葛湯以治陽明。則頭痛之症不能除。若徒用麻黃湯以治太陽。則汗出不能止。口渴不能解。勢必變症多端。而輕症變為重症矣。治法宜正治陽明。而兼治少陽也。何則。蓋邪入陽明。留于太陽者。不過零星之餘邪也。治太陽反傷太陽者。故太陽不必治。宜正治陽明。蓋陽明為多氣多血之府。邪入其中。正足大恣其凶橫。如賊入通都大邑。其搶掠之勢。較窮鄉僻壤自是不同。所得之物。轉足以供其跳梁之暴。故邪入太陽者。挾六腑之氣血。為炎氛烈焰者。往往然也。然則治法豈可以輕小之劑。遽望其解散之乎。故必須用大劑涼藥。始可祛除其橫暴也。方用石膏一兩。知母二錢。麥冬二兩。竹葉二百片。茯苓三錢。甘草一錢。人參三錢。柴胡一錢。梔子一錢。水煎服。一劑頭痛除。二劑身熱退。汗止。口亦不渴矣。此白虎湯之變方。用知石瀉陽明之火邪。用柴梔斷少陽之路徑。尤妙。重用麥冬以清補肺金之氣。使火邪不能上逼。尤妙。用茯苓引火下趨于膀胱。從小便而出。而太陽餘邪盡隨之外泄也。至於麥甘竹葉。不過取其調和臟腑。所謂攻補兼施也。或懼前方太重。則清肅湯亦可也。載之以便選擇。用石膏五錢。知母二錢。麥冬

一兩人參柴胡梔子錢各一獨活半夏錢各五水煎服

一冬月傷寒發熱口苦頭痛飢不欲飲食腹中時痛人以為太陽症也誰知是少陽症乎夫傷寒未有不從太陽入者由太陽而入陽明由陽明而入少陽者傳經之次第也何以初入太陽而即越陽明而入少陽也蓋少陽乃胆經也胆屬木木最惡金肺屬金主皮毛風邪之來肺金先受肺欺胆水之虛即移其邪于少陽故太陽症往往多兼少陽同病者此故耳然則此病乃二經同感而非傳經症也似宜二經同治矣而又不然單治少陽而太陽之病自愈柴胡二錢甘草一錢白茯苓三錢白朮五錢陳皮一錢黃芩一錢神曲一錢白芍五錢水煎服一劑熱止二劑頭腹不痛口亦不苦矣此逍遙散變方也何以用治傷寒有如此之神乎不知病在半裏半表之間此方解散奇表裏之邪既解而太陽膀胱之邪又何能獨留况方中原有茯苓以利腰膝而通膀胱之氣乎余所以止加神曲黃芩少解其胃中之火以和脾氣而諸症所以盡除也

用舒輕湯亦佳薄荷二錢白芍五錢甘草八分黃芩一錢白朮二錢茯苓五錢桂枝三錢水煎服

一冬月傷寒發熱口渴謔語時而發厥人以為熱深而厥亦深也疑是厥陰症誰知是太陰症乎夫太陰脾土也與胃為表裏表熱而裏亦熱此乃胃邪移入脾經也此症最危最急蓋人生以脾胃為主脾胃盡為火邪所燥而腎水有不立熬乾者乎治宜急救脾胃矣然救脾則胃火愈熾救胃則脾土立崩此中之消息最難然則終何以救之乎亦速救夫腎水之乾枯也方用玄參三兩甘菊花一兩生地一兩麥冬二兩芡實五錢水煎服此名救枯丹以玄參散脾胃浮游之火甘菊消胃中之火麥冬滋肺中之液助生地腎中之水庶幾滂沱大雨自天而降而大地焦枯立時漫漶又何旱魃之作祟乎又恐過于汪洋加入芡實以健土氣而又仍是腎經之藥則脾胃相宜俱得其灌溉之功而絕無侵凌之患此立

方之所以神也故一劑謔語定二劑口渴除三劑厥止身亦涼也此症世人不知治法即仲景夫子亦未嘗設及天師因鐸之請特傳神奇治法為傷寒門中之活命丹也

用清土散亦可石羔麥冬生地各一兩金銀花五錢白朮三錢甘草一錢水煎服

一冬月傷寒大汗而熱未解腹又痛不可按人以為邪發于外未盡而內結于腹中乃陽症變陰之症也余以為不然夫傷寒而至汗大出是邪隨汗而盡出直無邪之在中又何至有腹痛之疾此乃陽氣盡亡陰亦盡泄腹中無陰相養有似于邪之內結而作痛此陰陽兩亡之急症不可不治也夫痛之可按為虛不可按為實何以此症不可按而又以為虛乎不知陰陽兩亡腹中正將絕之候不按亦可疼痛難忍之時况又按而傷其腸胃安得不重增其苦所以痛不可按也此症急不可緩用急救陰陽湯人參二兩黃芪二兩熟地二兩當歸一兩白朮二兩甘草三錢水煎服一劑腹痛頓止身熱亦解汗亦盡止矣此方用參芪補氣使陽回于陰之內歸熟補血使陰攝于陽之中甘朮和腸胃而通腰膈使陰陽兩歸于氣海關元則亡者不亡而絕者不絕也倘認為陽症變陰純用溫熱之劑加入肉桂干姜附子之類雖亦能回陽于頃刻然內無陰氣陽回而陰不能攝亦旋得而旋失矣

用救亡散亦易奏功人參當歸熟地各一兩甘草一錢附子一片水煎服

一冬月傷寒大汗熱解腹微痛腰不能俯仰人以為邪在腎經未出用稀苓丸如防已治之非也此乃發汗亡陽陽虛而陰不能濟之故也夫陰陽兩相根也陰根于陽無陽則陰不能生陽根于陰無陰則陽不能化此因汗泄過多陽氣無幾而陰又自顧不遑不敢引陽入室而陽無所歸之途故行于腹孤陽無主而作痛矣腎中之陰又因陽氣不歸而孤陰無伴不敢上行于河車之路故腰不可以俯仰也引陽湯治之杜仲一錢肉桂三分山藥五錢甘草一錢茯苓二錢芡實二錢人參三錢白朮五錢水煎服

一齊臍痛止二齊腰輕三齊俯仰自如矣此方妙在救陽氣之旺而不去助陰氣之微蓋陰之所以杜陽者欺陽之衰也如夫婦好合豈忍永絕良人因其夫與外侮相爭狼狽逃回因羞變怒欲杜絕而不許入房倘其夫得朋資益捆載而歸嬪見金多有不開門笑迎者乎所以助陽而不助陰者實有鑒於此也倘用稀發防己以重損其陰陽則夫貧而婦亦貧彼此相仇有終身反目不成為廢人者幾希矣

濟陽湯亦可用杜仲二錢

山藥二兩

甘草一錢

人參五錢

白朮五錢

破故紙一錢水煎服

一冬月傷寒大汗氣喘不能息面如硃紅口不能言呼水自救人以為熱極欲用白虎湯以解其陽明之火也而不知非治法也此乃戴陽之症乃上發熱而下寒也若用白虎湯雖多加人參下喉即亡矣方用八味地黃湯半觔大鍋煎湯恣其渴飲必熟睡半日醒來語必正氣不喘面必白口不渴矣何故蓋此症原不宜汗而汗之必致大發其汗汗既大出而陽邪盡洩陽氣盡散而陰亦隨之上升欲盡從咽喉而外越汗出而陽氣奔騰不得盡為汗泄故直趨咽喉大路不可止抑矣陰既上升陽又外泄不能引陰而回于氣源陽亦隨陰而上而陰氣遂逼之而不可下故氣喘不能息也且陽既在上火亦在上者勢也況陽上升則腎宮寒極下既無火而上火不得歸源故泛炎于面而作硃紅之色也上火不散口自作渴呼水自救者救咽喉之熱而非欲救腸胃之熱也夫實熱多成于胃火而胃熱之病必多號跳狂呼之狀今氣喘不能息口不能言非虛熱而何此真所謂上假熱而下真寒也八味地黃湯妙在補水之中仍是補火之藥下喉之時火得水而解入胃之後水得火而安調和于上下之間灌注于肺腎之際實有妙用也夫發汗亡陽本傷氣也何以治腎而能奏功不知亡陽之病內無津液以致內火沸騰令大補其真陰則胃得之而息焰胃火一息而腎之關閉矣腎關閉而胃之土氣自生胃土生而肺金之氣有不因之而得養者乎肺氣一生自然清肅令行母呼子歸同氣相招勢必下引腎氣而自

歸于子舍矣。腎氣既歸而腎宮之中又有溫和春色以相薰。又得汪洋春水以相育。則火得水而生水。得火而悅。故奏功神速也。

近火湯亦神熟地 三兩 山萸 一兩 肉桂 三錢 水煎服。

一冬月傷寒發厥面青手冷兩足又熱。人以為直中陰寒也。用理中湯治之。而不知非治也。此肝邪鬱而不散。風邪在半表半裏之間也。若用理中湯必發狂死矣。夫直中陰寒之症。未有不從足而先冷者也。今兩足熱。非直中肝經明矣。邪既不在肝經。似乎不必重治肝經矣。然而邪雖不在肝經之內。未嘗不在肝經之外也。邪在門外。與主人何豫。而現發厥面青手冷之症也。不知震鄰之恐。猶然有警惕之心。豈賊在大門之外。而主人有不張惶色變者乎。是必登高號召。賊人知內有防護之人。恐外有救援之士。自易于解散逃遁。倘用理中湯。是用火攻以殺賊。賊未擒而房舍先焚。賊且乘火突入中庭。必至殺主人而出矣。治之法。用小柴胡湯加減。以散其半表半裏之邪。而肝氣自安。外邪化為烏有矣。用柴胡 二錢 白芍 五錢 甘草 一錢 當歸 一錢 半黃芩 一錢 半夏 一錢 水煎服。一劑手溫。再劑厥止。熱自盡除。而面青自白矣。

一冬月傷寒。汗自出。惡寒不惡熱。身熱。人以為陽明之症也。欲用石膏湯治之。而不知非陽明之症也。夫汗出似乎陽明。然陽明未有不惡熱者。今不惡熱而惡寒。此陽氣甚虛。邪欲出而不出。內熱已解。而內寒未散之症也。必因誤汗之故。所致用補中益氣湯。人參 三錢 桂枝 五分 黃芪 三錢 白朮 二錢 當歸 二錢 柴胡 二錢 升麻 四分 陳皮 一錢 甘草 一錢 水煎服。一劑汗止身涼。寒亦不惡矣。夫補中益氣湯。非治傷寒之方也。李東垣用之。以治內傷。實有神功。我何所取。以治傷寒之病。得毋見譏于長沙張使君乎。不知傷寒之中。亦有內傷之病。正不可拘拘于傷寒。而不思治變之方也。況此症誤汗而成者。汗已出矣。

邪之存于經絡者必淺。即有畏寒其寒邪亦必不重。是外感而兼內傷也。此方于補正之中。仍有祛邪之味。故兼用之而成功也。況加桂枝散寒之咸宜乎。倘認作陽明症。而妄用白虎湯。少投石膏。鮮不變為虛寒之症而死矣。烏可不辨證哉。

溫正湯亦可用。人參五錢黃芪一錢當歸五錢柴胡一錢甘草五分神曲一錢桂枝三分水煎服。

一冬月傷寒。身熱五六日不解。譫語低聲。口渴。小便自利。欲臥。人以為陽明之餘熱未解也。而予以為不然。夫譫語雖屬胃熱。然胃熱譫語。其聲必高。拂其意必怒。今但譫語而低聲。非胃熱也。但既非胃熱。何以口中作渴。欲飲水以救也。然口渴飲水。水不能化。痰上湧。反直走膀胱。而小便自利。其非胃熱又明矣。夫陽明火盛。多致發狂。今安然欲臥。當非胃熱之病。但既非胃熱。何以譫語口渴不解。至于五六日耶。不知此症。乃心虛之故也。心虛則神不守舍。而譫語。心虛則火起心包。而口渴。夫心與小腸為表裏。水入心。而心即移水入于小腸。故小便自利也。茯苓五錢麥冬一兩丹皮三錢柴胡一錢甘草五分水煎服。一劑譫語止。二劑口渴除。身熱亦解也。方名清熱散。用麥冬補心。茯苓分消火熱。柴胡丹皮甘草和解邪氣。心氣足。而邪不能侵。邪盡從少陽泄出。而心中甯靜。津液自生。故渴除而腎氣上交于心。而精自長。亦不思臥矣。若疑為胃熱。而用白虎青龍等湯。鮮不敗衄矣。

解涼湯亦可用。茯苓三錢麥冬五錢元參一兩柴胡一錢甘草三分炒棗仁一錢水煎服。

一冬月傷寒。至五六日。往來寒熱。胸脇苦滿。或嘔或吐。或渴或不渴。或煩或不煩。人以為少陽症也。用小柴胡湯和解之。大小柴胡治少陽邪之聖方。用之似乎合宜也。以少陽居于表裏之間。邪入而併于陰。則寒邪出而併于陽。則熱。故疾結于胸。而若滿。欲吐不吐。欲渴不渴。而煩悶生矣。用柴胡湯以解之。自易奏功。然止可一用。而不可嘗用也。何故。蓋少陽胆木。最喜者水耳。次則喜風。柴胡風藥得之則解。慍。

然日投以風藥。雖枝葉條達而終有乾燥之虞。一旦濟有大雨。則扶疎青翠。為何如耶。故用柴胡湯之後。必須補水之劑。以濟之。方用濟生湯。熟地五錢。元參五錢。麥冬三錢。山茱一錢。白茯苓二錢。山藥三錢。白芍三錢。柴胡五分。神曲三分。竹茹一圓。水煎服。一劑煩滿除。二劑寒熱止。三劑全愈。此方多補腎水之味。直補其胆木之源。則胆汁不枯。足以禦邪而有餘。況加柴芍。仍散其半表半裏之邪。安得不收功之速乎。若以傷寒之後。不宜純用補腎。以胃氣有傷。難以消化。不知少陽之症。由太陽陽明二經傳來。火燥水涸。不但胆汁為邪所迫。半至熬乾。而臟腑盡多炎燼。是各經無不喜盼霖雨。非但胆水喜水也。然則補水正其所宜。何至有停膈之虞哉。

和膈散亦妙。柴胡一錢。白芍一兩。生地五錢。竹茹一圓。元參三錢。麥冬二錢。茯苓三錢。水煎服。

一冬月傷寒。發熱至五六日。晝則了了。夜則譫語。如見鬼狀。按其腹則大痛欲死。人以為熱入血室也。而不知非止熱入血室也。雖亦因經水適來。感寒而血結。故成如癰之狀。然其未傷寒之前。原有食未化。血包其食。而為癰母也。論小柴胡湯為正治。然小柴胡止能解熱。使熱散于血室之中。不能化食。使食消于血塊之內。予有一方最神。治熱入血室亦正相宜。可全治之也。名兩消丹。柴胡二錢。丹皮五錢。鱉甲三錢。枳殼一錢。甘草一錢。查肉一錢。梔子二錢。炒白芍五錢。當歸三錢。桃仁十粒。水煎服。一劑痛輕。二劑塊去。諸語止。腹安。無寒熱之苦矣。此方既和表裏。而血室之熱自解。妙在鱉甲。攻于血塊之內。以消其宿食。所謂直搗中堅。而癰母何所存立。以作祟乎。

清白飲治之亦妙。柴胡前胡青皮梔子各二錢。丹皮茯苓當歸各三錢。人參半夏甘草各一錢。白芍一兩。五味五錢。水煎服。

一冬月傷寒。項背強。凡凡汗出惡風。用葛根湯加桂枝。而不愈。人以為太陽陽明合病。舍前方又將何藥。

以治之。而不知不可執一也。夫太陽之邪。既入陽明。自宜治陽明。不宜又顧太陽也。況于葛根湯中。仍加桂枝。以祛太陽之邪乎。是太陽之邪輕。而陽明之邪重矣。用竹葉石膏湯。瀉陽明之火。前症自愈。但不必重用石膏也。用石膏三錢。知母八分。半夏一錢。麥冬三錢。竹葉五十片。甘草一錢。水煎服。一劑汗止。二劑項背強几几之毒盡去。風亦不畏矣。倘必拘仲景方法。仍用葛根湯加桂枝。雖病亦能愈。而消灼津液矣。予所以更示方法。使治傷寒者。宜思變計。而不可死于古人之文內也。

清胃湯亦佳。元參生地各五錢。知母二錢。半夏一錢。甘草五分。水煎服。

一冬月傷寒。頭痛几几下利。夫頭疼太陽症也。几几陽明症也。是二經合病無疑。似乎而解。然而不可兩治之也。正以其下利耳。夫陽明胃土也。今挾胃中之水穀下奔。其勢欲驅邪盡入陰經。若不早治。陽明急止其利。則陽變為陰。熱變為寒。其害有不可言者矣。用解合湯治之。葛根二錢。茯苓五錢。桂枝三分。水煎服。一劑利止。二劑頭疼几几除盡。何也。蓋葛根乃太陽陽明同治之聖藥。況加桂枝。原足以散太陽之邪。而茯苓不獨分消水勢。得桂枝之氣。且能直入膀胱。膀胱正太陽之本宮也。得茯苓澹泄。而葛根亦隨之。同行祛邪。盡從小便而出。小便利。大便自止矣。此不止利而正。所以止利。不瀉陽明。而正所以瀉陽明。兩解之巧。孰能過於此者乎。所以不必兩治。只須一治之也。

用葛根三錢。人參一錢。桂枝五分。煎服亦可。

一冬月傷寒。六七日後。頭疼目痛。寒熱不已。此三陽合病也。而不可合三陽經統治之。夫邪之來者。太陽也。邪之去者。少陽也。欲去者而使之歸。來者而使之去。必須調和胃氣。胃氣一生。而陽明之邪自孤。勢必太陽少陽之邪。盡趨陽明以相援。而我正可因其聚。而急使之散也。用破合湯。石膏三錢。葛根三錢。茯苓三錢。白芍藥三錢。柴胡一錢。陳皮一錢。甘草一錢。水煎服。此方治陽明者十之七。治太陽者十之

一治少陽者十之二雖同治三經其實仍端治陽明也故一劑目痛愈矣再劑頭疼除矣三劑寒熱解矣此皆胃氣生之故而奏功所以甚速也倘不治陽明而治少陽則損傷胃氣而少陽之邪日引二經之邪盡遁入陰經反成變症不可收拾矣

和陽湯亦妙石羔五錢葛根白芍各二錢麻黃三分柴胡甘草各一錢天花粉五分水煎服

一冬月傷寒五六日吐瀉後又加大汗氣喘不得臥發厥者此悞汗之故人以為壞症不可治也夫汗後宜身熱盡解矣今熱不退而現此惡症誠不可治也吾欲于不可治之中而施可救之法亦庶幾于不宜汗之中而救其失汗乎蓋傷寒至吐瀉之後上下之邪必散而熱未解者此邪在中焦也理宜和解使當時用柴胡湯調治自然熱退身涼而無如其悞汗之也今悞汗後熱仍未退身仍未涼是邪仍在中焦也此時用柴胡湯則已虛而益虛不死何待必大補其中氣使汗出亡陽仍歸于腠理之內少加柴胡和解則轉敗為功實有妙用也救汗回生湯人參三兩當歸二兩白芍一兩廣陳皮五分柴胡一錢甘草一錢麥冬五錢水煎服一劑汗散二劑喘定三劑厥止然後減去柴胡將此方減去十分之六漸漸調理自無死法此救壞症之一法也人見人參之多未有不駭用藥之太峻殊不知陽已盡亡非多用參何以回陽于無何有之鄉尚恐人參回陽而不能回陰故佐以當歸之多助參以奏功又恐參歸過于勇猛又多用麥冬白芍使調和于肺肝之中使二經不相戰剋而陽回于陰之中陰攝于陽之內聽柴胡之解紛實有水乳之合也又何以多用參歸為慮哉

救敗湯亦效當歸人參麥冬各一兩白芍五錢神曲三分北五味十粒柴胡甘草各五分水煎服

一冬月傷寒汗吐後又加大下而猶身熱如火發厥氣息奄奄欲死人以為壞症不治矣然亦有可救之法也正以其誤下耳夫誤下必損脾胃之氣救脾胃未必非生生之道也惟是邪猶未解補脾胃之氣

未以不增風寒之勢。必須救脾胃而又不助邪之為得耳。用援下回生丹。人參五錢。白朮一錢。柴胡分五。赤石脂末一錢。甘草一錢。水煎服。一劑瀉止。厥定。二劑身熱解。口思飲食矣。切戒不可遽與飲食。只可少與米湯。漸漸加入米粒調理。若驟進飲食。必變為結胸之症。斷難救死也。夫同是壞症。前條何以多用人參。而此則少用人參也。蓋大汗亡陽。其勢甚急。大下亡陰。其勢少緩。亡陽者。陽易散也。亡陰者。陰難盡也。亡陽者。遍身之陽皆泄。非多人參不能挽回于頃刻。亡陰者。脾胃之陰盡。而後及于腎。故少用人參。而即可救于頃刻。此方之妙。在用參朮以固脾胃腎之氣。茯苓以分消水濕之邪。柴胡甘草以調和于邪正之內。加入赤石脂以收澀其散亡之陰。所以收功實神。此又救壞症之一法也。

用定亂湯亦神。人參山藥各一兩。茯苓苡仁各五錢。甘草黃連各五分。陳皮神曲各三分。砂仁一粒。水煎服。

一冬月傷寒。大汗後。又加大吐氣逆。嘔吐飽悶。胸中痞痛。時時發厥。昏暈欲死。譫語如見鬼神。且知生人出入。此亦壞症之不可救也。然亦悞吐之故。不宜吐而吐。以成此至危之症也。欲求悞吐之逆。而深思安吐之方。舍轉氣之法。又將何求乎。用轉氣救吐湯治之。人參一兩。茯苓五錢。旋覆花一錢。赭石末一錢。水煎服。一劑氣逆轉矣。另用招魂湯。人參三錢。茯苓三錢。山藥三錢。芡實三錢。神曲三分。陳皮三分。麥冬三錢。白芍五錢。柴胡二錢。水煎服。一劑身涼。神魂安貼。前症盡愈。夫汗下之後。身熱未解者。此邪在半表半裏也。理宜和解。乃不用和解。而妄用吐藥。邪隨氣涌。氣升不降者。因汗下之後。元氣大虛。又加大吐。則五臟反覆。自然氣逆而不能順矣。氣既逆矣。嘔吐何能遽止。胸中無物。而作虛滿虛痞之苦。以致神不守舍。隨吐而越出于軀壳之外。故陰陽人鬼盡能見之也。似宜先追魂奪魄之為急。而必先轉氣者何也。蓋氣不轉。則神欲回而不能回。魄欲返而不能返也。所以先轉其氣。氣順而神自歸也。況轉